

## Opitz, Martin: Hochzeit Gedichte (1624)

1 Nach dem die Welt gegründet vnd jhr Termin gesteckt/  
2 Nach dem die schöne Lufft rundt vmb sich außgestreckt/  
3 Vnd auch die wilde See/ die nah' vnd weit zukommen  
4 Pfllegt nach deß Monats lauff/ jhr örter eingenommen/  
5 Sah Jupiter hinab/ vnd spürete niemandt/  
6 Der diß gewaltig Hauß brecht vnder seine Hand.  
7 Drumb von seins Vatters deß Saturnus Leib er hiebe  
8 Das theil so schändtlich ist/ doch nötig in der Liebe.  
9 Vnd warff es in das Meer/ darauß ein Schaum herkam/  
10 Davon das geyle Weib die Venus Vrsprung nam/  
11 Das geyle Weib/ das Weib das aller Götter Sinnen/  
12 Mit jhrem blinden Kind hat listig rauben können/  
13 Sie haben gantz vnd gar gebracht in kurtzer Zeit  
14 Das Menschliche Geschlecht in jhre Dienstbarkeit/  
15 Sie theten vber diß ein ärger wesen führen/  
16 Beweisen jhre Macht auch an den stummen Thieren/  
17 So das nun vberal durchauß nichts leben kan/  
18 Es muß jhr vnd dem Kindt allzeit sein vnderthan/  
19 Das Kindt/ das lose Kindt/ das mit dem Pfeil vnd Bogen/  
20 So sehr viel hundert Jahr ist durch die Lufft geflogen/  
21 Vnd hat sein grosses Reich gewaltig starck vermehrt/  
22 Ja auch die Mutter selbst ohn alle schew versehrt/  
23 Das Joch muß jhr doch auch noch angeworffen werden/  
24 Von jhrem eignen Sohn/ der Herr ist dieser Erden/  
25 Vnd Printz der weiten Welt/ der helt die Lufft vor sein/  
26 Die zierlich ist gewirckt mit lichten sternelein/  
27 Die mit der strahlen glantz gehn auff der weissen strassen/  
28 Vnd in der hollen Kaut Lufft/ Erdt vnd See vmbfassen.  
29 Nun laßt vns doch besehn wohin der schöne Sohn/  
30 Der grosse kleine Gott gebauet seinen Thron/  
31 Er hat jhm außerwehlt der Augen Thron zu eigen/  
32 Die vns sein Königreich/ als klare Spiegel/ zeigen.  
33 Der Augenapffel ist die Kugel dieser Welt/

34 Das Wasser aber/ das der Apffel in sich helt/  
35 Das sind die milden Quell so auß den Bergen schiessen/  
36 Vnd durch das grüne Thal mit sanfftem rauschen fliesen.  
37 Der Circkel runde Krantz/ der vmb den Apffel geht/  
38 Das ist die wilde See die nach der Erden steht/  
39 Der Augen weisser Platz so sich vmbher ergeusset/  
40 Das ist die klare Lufft/ die Erdt vnd See beschleusset.  
41 Es ist ein wunder ding daß das vierdt Element  
42 Auch in den Augen nicht von andern ist getrennt/  
43 Das Fewer/ so durchs Meer gantz hell vnd lieblich blicket/  
44 Vnd mit dem schönen schein vns Muth vnd sinn entzucket.  
45 Das Fewer/ so den Weg jhm durch die Augen nimbt/  
46 Vnd vnvermerckter sach in vnser Herten kümpf/  
47 Da ruht es ohne Ruh/ da hebt es an zu brennen/  
48 Daß wir der Liebe krafft vnd vns in vns nit kennen.  
49 Was Wunder ist es dann/ daß er mit seinem Band/  
50 Die Welt bezwungen hat durch seine schwache Hand/  
51 Der tausent Welten hat/ die Augen/ da er zeugen  
52 Vnd klärlich darthun kan/ wie er vns könne beugen?  
53 Diß ists/ das euch bezwang/ diß ists/ Herr Bräutigam/  
54 Diß ist die newe Welt so ewer Hertz einnam/  
55 War euch auch wol zu muth/ gabt jhr euch auch verlohren/  
56 Als die vier Element zugleiche sich verschworen/  
57 Zu liefern eine Schlacht/ die in der Augen Welt  
58 Sich alle lägerten/ vnd gaben sich zu feldt?  
59 Ihr habt euch warlich wol die Rechnung machen können/  
60 Daß vier so starcke Feind euch würden angewinnen/  
61 Ihr thut auch was jhr wolt/ jhr brauchet alle Kunst/  
62 Ich halte nur dafür die Arbeit sey vmbsonst/  
63 Bey dreyen were Rath/ dem vierden zuentfliehen/  
64 Dem Fewer/ weiß ich nicht ob man sich darff bemühen.  
65 Was laufft jhr viel vnd sucht? die Hülff ist bey der Hand  
66 Wer hie genesen will/ der muß doch zudem Brandt/  
67 So erstlich jhn entzündt: diß sein Achilles Wunden/  
68 Die niemand heilt/ als der/ von dem man sie empfunden.

69 Was gibet man den an? das bitten ist das best/  
70 Es ist ein Hertz von Stein/ so sich nicht biegen lest/  
71 Nit lengst hab ich gehört von einer Feldgöttinnen/  
72 Wie jhr/ Herr Breutigam/ habt pflegen zu beginnen/  
73 Ein sehnlich Klagelied/ das Wald/ Feld/ Berg vnd Thal  
74 Es haben widerholt mit kläglichem Nachschall/  
75 Die Nyinffen haben es mit Wehmut auch vernom men/  
76 Vnd mein  
77 All mein Leiden/ Lieb vnd Schmertze  
78 Hatmein Hertze  
79 Gantz vmbringt mit Trawrigkeit/  
80 Als ein forchtsam Hirsch muß eilen  
81 Für den Pfeilen/  
82 Flieg vnd renn ich jederzeit.  
83 Ich vollführe meine Klage  
84 Nacht vnd Tage/  
85 Denckend an der Liebe quell/  
86 Stets die Threnen mich begiessen/  
87 Die da fliessen/  
88 Als zwey Bäche von Cristall.  
89 Wolt jhr demnach/ Jungfraw/ geben  
90 Meinem Leben  
91 Hülff vnd Trost in diesem Leidt/  
92 So erbarmt euch doch bey zeiten/  
93 Thut bereiten  
94 Nach dem Trawren Lust vnd Frewd.  
95 Ehe daß sich bey mir beginnen  
96 Alle Sinnen  
97 Zu verliern/ vnd aller Muth/  
98 Rettet mich von dem Elende/  
99 Ehe das Ende  
100 Selbst bey mir das beste thut/  
101 Ach Printzessin/ ach Jungfrawe/  
102 Euch ich trawe/  
103 Ihr seid meine Medicin

104 Vor das weinen/ vor das klagen/  
105 Laßt mich sagen/  
106 Daß ich ewer Diener bin.  
107 Wie solte sie jhm thun? jhr werdet doch gewehrt/  
108 Kein Mannes Tropffen fellet vergebens zu der Erdt/  
109 Vnd was ist besser Rath/ eins hat gebrandt das ander/  
110 Als daß jhr nun zugleich geneset mit einander?  
111 Geht an/ jhr liebes par/ was trettet jhr beseit?  
112 Es ist jetzund gleich recht/ jetzt ist die beste zeit/  
113 Daß jhr die Hitze lescht. Was wolt jhr viel verziehen.  
114 Was wolt jhr selber das/ so jhr gewünschet fliehen?  
115 Was ist es/ Jungfraw Braut/ wolt jhr zu rücke gehn?  
116 Es hilfft gewiß euch nicht/ jhr müsset doch gestehn/  
117 Es ist nun fort mehr alt/ daß man nit kan vertreiben  
118 Zugleich der liebe Brunst/ vnd dannoch Jungfraw bleiben/  
119 Der Bräutigam der kompt/ er gehet vff euch zu/  
120 Jungfraw/ es ist das best/ jhr gebet euch zu Ruh/  
121 Es ist der nechste Rath/ daß man ein Hertze fasse/  
122 Vnd was man nit vermag zu halten/ willig lasse.  
123 Trett ab/ jhr Jungfräwlein/ die Braut hat jetzt nit Zeit/  
124 Laßt sie zu Bette gehn/ hört auff von ewrem streit/  
125 Zu einem andern streit muß sie sich jetzund kehren/  
126 O daß wir allesamt in solchem streiten weren.

(Textopus: Hochzeit Gedichte. Abgerufen am 23.01.2026 von <https://www.textopus.de/poems/10682>)